



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Sumáriu Kazu

Períodu: Janeiro 2012

Edisaun: 13 Feveiru 2012

Sumáriu julgamentu ba kazu krime iha Tribunál Distritál Baucau períodu Janeiro 2012

Introdusaun

Iha fulan Janeiro 2012 JSMP kontinua halo monitorizasaun ba prosesu julgamentu ba kazu sira ne'ebé tama iha agenda tribunál nian atu halo julgamentu, partikularmente iha Tribunál Distritál Baucau. Kazu hirak ne'e inklui kazu krime sira ne'ebé klasifikadu hanesan kazu krime grave no simples.

JSMP hahú atividade observaun tribunál husi semana segundu no terseiru fulan Janeiro 2012 iha Tribunál Distritál Baucau. Tuir observaun JSMP nian katak prosesu julgamentu la'ó la hanesan bain-bain tanbá, dala ruma kada lora iha deit kazu 1 no lora balun la iha kazu maski tribunál tau ona iha agenda hodi halo julgamentu. Durante observaun, JSMP deskobre katak kazu balun la konsege halo julgamentu tanbá prokuradór sira tuir treinamentu durante lora tolu iha Dili hahú husi lora 16 até 18 janeiro 2012.

Iha períodu ida ne'e, JSMP konsege monitoriza total kazu hamutuk 6 ne'ebé tribunál rejista atu halo julgamentu. Kazu hirak ne'e kompostu husi kazu krime grave 5 no kazu krime simples 1 ne'ebé inklui ofensa ba integridade física simples 1, kazu ofensa ba integridade grave 2, kazu violasaun seksuál 2 no kazu pekulatu no abuzu poder 1.

Husi total kazu 6 ne'e, kazu rua (ofensa ba integridade física simples 1 no grave 1) hetan desizaun. Entertantu kazu violasaun seksuál 2 sei kontinua halo' o julgamentu no kazu ofensas ba integridade grave 1 no kazu krime pekulatu no abuzu poder 1 adia tanbá prokuradór sira la marka sira nia presenza iha tribunál.

Hanesan ho sumáriu sira iha tinan 2011 nian laran, sumáriu ida ne'e ho objetivu atu habelar informasaun foun ne'ebé aktualizada bazeia ba rejultadu monitorizasaun JSMP relasiona ho lala'ók prosesu julgamentu ne'ebé la'ó iha Tribunál Distritál Baucau.

Tuir mai sumáriu ba julgamentu kazu kompletu:

1. Kazu violasaun seksuál, Nú. 45/Crm.C/2011/TDB

Iha loron 09 Janeiru 2012 Tribunál Distritál Baucau kontinua hala'ó julgamentu ba kazu violasaun seksuál ne'ebé rejista ho número prosesu: 45/Crm.C/2011/TDB. Kazu ne'e involve arguidu ho inisiál SS hasoru vítima ho inisiál LdSSF, ne'ebé diskonfia akontese iha loron 26 Setembru 2009, iha Aldeia Aiten, Suku Maabat, Sub Distritu Manatuto, Distritu Manatuto.

Prosesu julgamentu ba kazu refere prejide husi juízes kolektivu ne'ebé kompostu husi Dra. Ângela F. Belo, Dr. José Gonsalves no Dr. António J. Fonseca Monterio de Jesus, Ministériu Públiku representa husi Dr. Adérito Tilman no Arguidu hetan akompañamentu husi Dr. Gregório de Lima husi Defensoria Públiku.

Tanbá natureza husi kazu ne'e, prosesu julgamentu ba kazu refere taka ba públiku. Tuir informasaun ne'ebé JSMP hetan husi ofisiál justisa katak julgamentu ne'e, tama ona ba faze alegasaun finál husi tribunál. Depoisode alegasaun, juízes kolektivu deside no marka loron 20/01/2012 hodi lee leitura akordaun.

2. Kazu krime ofensa ba integridade fízika simples, Nú. 165/Crm.S/2011/TDB

Iha loron 11 Janeiru 2012 Tribunál Distritál Baucau halo julgamentu ba kazu krime ofensa ba integridade fízika simples. Kazu ne'e rejistu ho número prosesu:165/Crm.S/2011/TDB. Kazu refere involve arguidu ho inisiál DES hasoru vítima ho inisiál GCC, ne'ebé akontese iha loron 18 Maiu 2011, iha Eskola Primária-SDK Santa Maria Gorete Viqueque.

Prosesu julgamentu ba kazu ne'e prejide husi juis Dr. Afonso Carmona, Ministériu Públiku representa husi Dr. Pascasio de Rosa Alves no arguidu hetan assistensia legál husi Dr. Grigorio de Lima.

Relasiona ho kazu ne'e, juíz direítu Dr. Afonso Carmona konsege halo tentativa konsiliausaun. Iha tentativa konsiliausaun refere, parte rua deside atu simu malu no dame malu iha tribunál no tribunál omologa akordu dame ne'e, maibé husu ba parte rua atu la repete tan hahalok hanesan iha futuru.

3. Kazu krime ofensa ba integridade fízika grave, Nú. 33/PID.S/2003/TDB

Iha loron 16 Janeiru 2012, Tribunál Distritál Baucau halo julgamentu ba kazu krime ofensa ba integridade fízika grave. Kazu ne'e rejista ho número prosesu 33/PID.S/2003/TDB. Kazu refere involve arguidu ho inisiál FdS hasoru vítima ho inisiál MdS, ne'ebé akontese iha loron 24 Setembru 2002, iha Suco Nahareca, Sub Distritu Ossu, Distritu Viqueque.

Ministériu Públiku akuza arguidu ba kazu refere ho artigu: 354 KUHP Indonézia. Tuir prosesu ne'ebé JSMP nota iha kazu refere katak, kazu ne'e tuir loloos hetan ona desizaun iha tinan 2005

nian laran, maibé desizaun ne'e la ezekuta ate adata tanbá desizaun ba kazu refere lakon tiha ona. Ho razaun ne'e, Juíz de Direítu, Dra. Ângela F. Belo, notifika parte sira (arguidu no vítima) no konfirma atu halo konsiliaun. Iha prosesu konsiliaun refere parte sira simu malu no prontu atu dame malu fali. Tribunál halo akta dame ba kazu refere no omologa nia prosesu sira

4. Kazu pekulatu no abuzu poder, Nú. 94/Crm.C/2011/TDB

Tuir agenda Tribunál Distritál Baucau iha loron 17 halo julgamentu ba kazu krime pekulatu no abuzu poder ne'ebé involve arguidu sira ho inisiál DS ho nia tezoreiru ho inisiál RJ. Kazu ne'e konsidera nu'udar krime hasoru estadu tanbá arguidu sira kontra sira nia obrigasaun hanesan funsaun públiku hasoru estadu. Kazu ne'e akontese iha loron 18 Marsu 2009, iha edifisiu administrasaun públiku Baucau.

Julgamentu ba kazu refere la konsege hala'ó no juíz direítu Dr. Ângela Faria Belo, decide atu adia fali nia prosesu ba loron 19 Marsu 2012, tanbá prokuradór sira la marka sira nia prezensa iha tribunál.

5. Kazu krime ofensa ba integridede fízika grave, Nú 231/Crm.C/2009/TDB

Tuir agenda Tribunál Distritál Baucau iha loron 17 halo julgamentu ba kazu krime ofensa ba integridade fízika grave ne'ebé involve arguidu ho inisiál AJ hasoru vítima ho inisiál LJ iha Distritu Iliomar Distritu Lautem. Ba kazu ida ne'e JSMP la konsege rekolla akontesementu, tanbá data ne'ebé akontesementu la konfirmadu.

Kazu ne'e mós la konsege halo julgamentu tanbá prokuradór ne'ebé kaer kazu refere la marka nia prezensa tanbá ne'e tribunál decide atua adia fali ba data ne'ebé seidak klaru ka tribunál la define data definitivu ba kazu ne'e.

6. Kazu violasaun seksuál, Nú. 26/Crm.C/2011/TDB

Iha loron 19 Janeiru 2012 Tribunál Distritál Baucau hala'ó julgamentu ba kazu violasaun seksuál. Kazu ne'e rejistu ho número prosesu 26/Crm.C/2011/TDB. Kazu refere involve arguidu ho inisiál AF hasoru vítima ho inisiál LESP, ne'ebé akontese iha loron 18 Maiu 2010, iha Ossu, Distritu Viqueque.

Julgamentu ba kazu ne'e ho agenda rona deklarasaun husi arguidu no depoimentu husi lezadu no testamuña sira.

Julgamentu ba kazu refere prejide husi juízes kolektivu ne'ebé kompostu husi Dr. José Gonsalves Dr. Afonso Carmona Dra. Ângela F. Belo, Ministériu Públiku representa husi Dr. Pascásio de Rosa Alves no Arguidu hetan defeza husi Dr. Marçal Ximenes Guterres husi Eskritóriu ECM.

Iha prosesu julgamentu refere tribunál rona deklarasaun husi arguidu, lazadu no depoimentu husi testamuña nai rua ne'ebé tribunál apresenta. Depoisde rona tiha deklarasaun no depoimentu husi

parte sira, tribunál halo kedas alegasaun finál no tribunál marka loron 09 Feveireiru 2012 hodi lee leitura akordaun ba kazu refere.

Atu hatene informasaun kle'an favor kontaktu direktamente:

Dr. Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883